

17. juli 2015

UKA 2015/29

Inatsisartut suleriaasianni § 36 naapertorlugu matumuuna apeqquteqaat aallaavigalugu oqallinnissamik siunnersuut saqqummiuppara:

Eqqortuusinnaava pisortat suliffeqarfiutaata Royal Greenland A/S-ip tunisassiorfinnik nammineq ingerlakkumannngisaminik namminersortunut aallartisartunullu tunisigaangami unamillinnnginnissamik pituttuisumik piumasaqaatitalinnik isumaqatigiissuteqartarnera (konkurrenceklausul)- pillugu, apeqquteqaat aallaavigalugu Inatsisartut oqallinnissaannik siunnersuut.

(Inatsisartunut ilaasortaq Jens Immanuelson, Siumut)

Soorunami uanga Inatsisartunut ilaasortatut kissaatiginngilara pisortat ingerlatseqatigiiffiutaasa ingerlanneqarnerannut akuliunnissara. Aktiateqarluni ingerlatseqatigiiffiit pillugit inatsit naapertorlugu Naalakkersuisut suliassaraat pisortat pingisaannut aktiateqarluni ingerlatseqatigiiffinnut pinginnittut isumaginnittuussallutik. Kisianni inatsisartut akisussaqaataanermisunik qimarratiginissinnaanngillat Naalakkersuisut ingerlatseqatigiiffinnut suliassaasa sinaakkusersornissaat pillugu. Taamatullu Inatsisartut pinngitsuusaaginnarsinnaanngillat pisortat pingisaat ingerlatseqatigiiffik inuiaqatigiinni pissusissamisuunngitsunik qanoq iliuseqarpat.

Namminersornerulernitta eqqunneqarnerata kingornatigut ingerlatseqatigiiffiuteqalersimavugut aalisarnermi tunitsiveqartitsinermi pingaaruteqarluinnartumik inissisimasumik, inoqarfippassuarni aningaasarsiornikkut imaani inuussutissarsiteqarnermik tunngaveqarnitsinni, minnerunngitsumik nunaqarfinni pingaaruteqarluinnarpoq tunitsivissaqartitsinissaq aamma sumiiffimmi tunisassiarineqarsinnaasunut naleqqussarsinnaaneq. Aalisagarpassuaqarpormi atorluannngisatsinnik illoqarfiit nunaqarfiillu eqqaani aningaasarsiutiginnngisatsinnik.

Ileqquliunneqarsimagunarpoq akigissaartumik avammut tunineqarsinnaasut aningaasarsiutigipallannissaat, sumiiffimmi sunik periarfissaqarnersoq aallaavigalugu tunisassiorsinnaaneq soqutigineqarunnaarsimalluni, tamanna ileqqupalaaliunneqarsimavoq pingaartumik nammineq pigalugu oqaatigisagarput Royal Greenland eqqarsaatigalugu.

Pigisatsinnik pinnguartitsinerput qaqugu unitsissavarput? Qaqugulu piginnittut aalajangiisnnaatitaalissaagut? taamatut aperisariaqalersimavunga aamma tamakkiisumik Namminersorlutik Oqartussat suliffeqarfiutaat allat eqqarsaatigalugit.

Aalisarneq aningaasarsiornermi qitiuvoq, taamaattumik tunitsiveqarneq innarlerneqaraangat nunami assigiinngitsorpassuartigut sunniuteqartarpoq, pingaartumik innuttaasut sumiiffinni najugaqartut akornanni. Sumiiffiit mattussiviusut eqqaanni allatigut periarfissat qinikkanik nammineq nunaqartunik qanorluuniit uppersarnarneqartigigaluarpata tusaajumaneqarneq ajorput.

Ilaanni imminut aperisarpunga; Selskabiutivut aqussinnaajunnaarsimavavut? Ukiopanngortuni pisutsit atuupput, ilaatigut nutaarsiaralugillusooq politikikkut allaat unamissutinngorsimasutut oqaatigisariaqalersimallutik. Pinnguarfigineqarpugut immaqa ikioqatigiisnnaanngigaaratta? Apequtit ilaatigut itisuumik eqqarsaatigisarpakka, aaqqiisnnaasariaqarpugulli aamma killiliisnnaa-

sariaqarpugut pissutsit taamatut ittut nalaattuakkavut uteqattaartut oqaatigisinnaasariaqarparput; uunga killikutta aaqinneqareersimasariaqartut.

Misilittakkat malillugit tunitsivitsigut, pisortat pigalugu ingerlatarput oqartarnitsit pingaarutilimmik inissisimavoq, tassalu Royal Greenland A/S apeqqutitut ilaasariaqarsoraara: angivallaalersimasoruna allaat inuiannik sullissinissaq soqutiginarnerpaajunnaarsimalluni?

Taamatullu aamma misilittagarineqarpoq Royal Greenland A/S-ip ingerlataani suliffissuit akilersinnaanginerarlugit matuneqartarnerat, taamatut pisoqaraangat innuttaasut pingaartumik nunaqarfanni suliniuteqalartarput, aammalu aalisarnermi nunatsinni inerisaaniarlutik suliniuteqartut pissutsinik aaqiiniaqataallutik. Ileqqupalaajuvorlu allanik suliffissuit ingerlanneqartussatut pisiaritinneqaraangata pituttuisoqartarmat, sumiiffimmi tunisassianerineqartut tunisassianerineqannginnissaanik imaluuniit namminerminnut akilersinnaanginnerarlugu matuseriarlutik pituttuisumik tunioraasussangorlugit. Allatut oqaatigalugu aallartisarput akilersinnaangitsumik ingerlatsinissaat qulakkeereerlugu, ileqqupalaaq tamanna peerluinnartariaqalerpoq.

Misilittakkat malillugit nammineq akilersinnaangitsutut matusanik Royal Greenlandimit pituttuisuungitsumik pisisimasumik isumaqatigiisuteqartoqartillugu ingerlallualertarnerat minnerungitsumik nunaqarfanni misilittagarineqarmat.

Aalisakkat tunisassiarineqanngitsut taamatullu nunap iluani imminut pilersornermut naleqqussaallutik akilersinnaanginnerakkanik ingerlatsilersartut, pituttuisuungitsumik ingerlatsilersimatillugit tamanna nunaqartunut, inuiaqatigiinnut suliffissaqarnermullu annertuumik ajunngitsumik sunniuteqartarmata nunatsinni innuttaasut akileeqataanermikkut pilersitseqataaffigisaat pituttuisumik isumaqatigiissusiortarnerat unitsilluinnartariaqarpoq, tamannalu aqutissiuuneqartariaqalerpoq.

2009-mi Namminersorneq eqqunneqarmat immitsinnut pisussaaffilernikuuvugut, siunissamimi suut tamaasa nammineerluta akilertussaavavut, aamma uummaterput atorlugu namminersornermit annerusumik pisussaaffeqalernissarput aqutissiuukkusupparput, taamaattumik aporfilersuutit piiarnissaanut nammineq ingerlatseqatigiiffiuterput aqqissuuniartigu, nunaqarfanni illoqarfanni tunngaviusumik inuussutissarsiut naleqqussarlugu, nammineerusuttut aporfilersornagit.

Taamaattumik Royal Greenland-ip tunisassiorfinnik tuniniaanermini pituttuisumik piumasaqaatitalinnik isumaqatigiissuteqartarsimanerata atorunnaarsinneqarnissaa siunnersuutigaara.

Apeqquteqaat aallaavigalugu oqallinnermit Inatsisartut oqaaseqaatissaattut siunnersuut imaattoq saqqummiuppara:

**Aktiateqarluni pisortat ingerlatseqatigiiffiutaannut piginnittutut pisussaaffeqarnek naaper-
torlugu Naalakkersuisut Inatsisartunit kaammattorneqarput, nunaqarfanni Royal Greenland
-ip tunisassiorfiutaanik tunisisoqartillugu ingerlatseqatigiiffissuarmut aningaasarsiornikkut
akornutaasussaatinagu unammillnnginnissamik pituttuisumik piumasaqaatitalinnik
isumaqatigiissuteqartarnerup (konkurrenceklausul)-ip atorneqartarnerata killilernissaa
suliareqqullugu, taamaaliornikkut najugaqarfimmi tunitsiveqarnerup suliffissaqartitsinerullu
annertunerpaamiitinnissaat qulakkeerneqaqullugu.**